

PYSADOW NOS KERNOWEK (SWF/T)

Re wrello an Arluth Ollgalosek grontya dhyn nos cosel ha diwedh perffeyth. **Amen.**

Tewlewgh warnodho ev oll agas fienasow, rag yma va orth agas cara whi.
1 Peder 5:7

Tewel a wrer hag ombredery a-dro dhe wharvosow an jedh.

A Dhuw, an Tas, **kebmer mercy ahanav.**
A Dhuw, an Mab, **kebmer mercy ahanav.**
A Dhuw, an Spyrays Sans, **kebmer mercy ahanav.**
A Drynses Venigys, sans ha gloryes, **kebmer mercy ahanav.**

Re gernerro Duw Ollgalosek mercy ahanav, re wrello gava dhybm ow fehosow ha'm ledya bys y'n bewnans eternal. Amen.

Y hyllir cana hynpna.

AN SALM (*Y hyllir usya onan a'n Salmow ma ynwedh: Salm 4, 24, 46, 67, 91 bo 121*)

- 1 Dewgh, benigewgh an Arludh, oll whi servysy an Arludh,
usy ow sevel y'n nos yn chi an Arludh.
- 2 Drehevewgh agas diwla tro ha'n tyller sans ha benigewgh an Arludh;
gwrens an Arludh agas beniga yn mes a Zion, an Arludh neb a formyas an nev ha'n nor.
Salm 134

Re bo gordhyans dhis, a Dhuw, agan Formyer, agan Saviour ha'gan Spyrasedh, y'n tor' ma ha bys vynary. Amen.

REDYANSOW YN-MES A'N SCRIPTUR SANS

De Sul, de'golyow, ha dhyworth Dedh Nadelik bys De'gol Stool Crist yw an imaj a'n Duw na yll bos gwelys. Ev yw an kensa genys a oll Creacyon, rag ynno ev y feu formys keniver tra yn nev hag y'n nor, taclow hewel ha diwel. Puptra a veu formys dredho ev ha ragdho ev. Kyns es puptra dhe vos creatys yth esa Crist, hag ynno ev yma puptra keskelmys war-barth. *Colossians 1: 15-17*

De Lun Jesu a leverys dh'y dhyscyplys: 'Whi yw golow an bys. Cita a veu setty's war venydh, ny yll bos cudhys, na ny vedh cantol enowys ha gorrys yn-dadn vushel, mes war goltrebyn, ha nena hi a wra gul golow dhe gebmys a vo y'n chi. Yndella gwrens agas golow terlentry dherag tus, may hallens i gweles agas oberow da, ha gordhya agas Tas usy yn nev.' *Matthew 5: 14-16*

De Meurth Jesu a leverys: 'Rag hedna me a lever dhywgh: na vedhewgh prederys adro dh'agas bewnans, pandr'a vydnogwh whi dybry bo eva, na beth moy a-dro dh'agas corf, pandr'a yllowgh whi gorra y'gas kerhyn. A nyns yw an bewnans moy ages sosten, ha'n corf moy ages dillas? Mirewgh orth ydhyn an ayr: ny wrons naneyl gonis has, na myjy, na cuntel yn skiberyow, saw yma agas Tas y'n nev orth aga maga. A nyns owgh whi polta moy a vri agessans i? Na vedhewgh ytho prederys a'n jedh a-vorow—rag an jedh a-vorow a vydn dri anken anodho y honan. Lowr dhe'n jedh hedhyw yw y dhrog y honan.' *Matthew 6: 25, 26, 34*

De Merher hag yn termyn an Pencast Me a vydn scollya dowr glan warnowgh, ha whi a vedh glan dhyworth oll agas avlanethter. Ha me a vydn ri dhywgh colon nowydh. Me a vydn kemeres dhe-ves an golon a ven yn-mes a'gas corf ha ri dhywgh colon a gig; ha whi a vedh ow fobel vy, ha me a vedh agas Duw whi. *Ezekiel 36: 25a, 26, 28b*

De Yow hag y'n Asvens Bedhewgh difun ytho, rag ny wodhowgh mann pana dermyn a vydn mester an chi dos tre, gorthuher po hanternos, po orth terry an jedh po myttin. Bedhewgh difun rag own ev dhe dhos a-dhesempys ha'gas cavos whi yn cosk. An peth esov vy ow leverel dhywgh whi, me a'n lever dhe geniver onan: bedhewgh difun. *Mark 13: 35-37*

De Gwener, y'n Corawys hag y'n Seythen Sans Rag y feu oll lanwes Duw plesys dhe driga ynno ev. Dredho ev Duw a veu pes da dhe gesseny puptra ganso y honan, y'n nor kyn fe hag yn nev. Duw a wrug cres ynter y honan ha'n bys dre woos y Vab y'n growspren. *Colossians 1: 19-20*

De Sadorn hag yn termyn an Pask Yth esa Duw kebmys ow cara an bys, may whrug ev ri y unn vab, ma na wrella mos dhe goll den veth a gryssa ynno, mes cavos an bewnans heb diwedh. Ya, ny wrug Duw danvon y Vab a-berth y'n bys rag dampnya an bys, saw may halla an bys bos selwys dredho ev. *Jowan 3: 16-17*



De'gol Sans bo Sanses A-badn eus cloud mar vras a dhustuniow a-dro dhyn, gesewgh ni dhe settya a-denewen pub sawgh ha pub pegh usy ow clena mar glos orthyn. Gesewgh ni dhe bonya gans perthyans an reseghva usy dheragon. Gwren ni mires orth Jesu, rag orto ev yma agan fedh ow cregy dhia an dalleth bys y'n diwedh. *Ebrowyon 12: 1-2a*

CANTIKYL YN-MES A'N AWEYL – *Nunc Dimittis*

**Gwith ny yn saw, a Arludh, yn tewolgow an nos ma,
rag an wlascor heb diwedh, may fedh golowys ow tewynnya bys vykken ha bys vynary.**

1 Y'n tor'-ma, a Arludh, yth esos ow tanvon dha servont dhe-ves
yn cosoleth war-lergh dha lavar.

2 Ow dewlagas ow honan re welas dha selwans
a wrussys pareusy dherag fas oll an poblow;

3 May halla bos golow dhe wolowy an Jentyls
ha glory dhe'th pobel Israel.

**Gwith ni yn saw, a Arludh, yn tewolgow an nos ma,
rag an wlascor heb diwedh, may fedh golowys ow tewynnya bys vykken ha bys vynary.**

AN PYSADOW

Agan Tas ni eus y'n nev,
benigys re bo dha hanow.
Re dheffo dha wlascor.
Dha vodh re bo gwres
y'n nor kepar hag yn nev.
Ro dhyn ni hedhyw agan bara a bub dedh oll,
ha gav dhyn agan cabmweyth,
kepar dell eson ni ow cava dhe'n re na usy ow cul cabmweyth war agan pydn ni.
Ha na wra agan gorra yn temptacyon,
mes delyrv ni dhyworth drog.
Rag dhyso jy yw an wlascor, ha'n gallos, ha'n gordhyans,
bys vykken ha bys vynary. Amen.

Y hyllir gul pysadow rag taclow ha tus divers obma hag y hyllir leverel colectys erel ynwedh.

**Gallos ha confort an Tas re bo genen pub termyn;
Jesu an Mab, leun a ras, socor ni mo ha myttin;
An Spyrys Sans benigys y ras genen may kyffyn;
Maria, Mabm ha Gwerhes, dhe vercy Duw pys ragon.**

Pysadow Sylvester Sans – Bewnans Meryasek

Re wrello an Arludh agan beniga, agan gwitha rag oll drog, ha'gan dri dhe'n bewnans heb diwedh. Amen.

Me a vydn growedha yn cres ha cosca keffrys; rag ty dha honan, a Arludh, a wra dhyn triga yn sekerder. *Salm 4:8*

Notyansow: *Y hyll den udnik leverel Pysadow Nos rag oll an re na usy trigys yn chi. Gwell yw y leverel heb fysky, hag y coodh tewel tabm wosa redya keniver salm. Pan vo an offis ma leverys gans tus war-barth, an leder a lever versyow dibarow an salm ha'n cantikyl, ha'n re erel a wra y worthyby gans an versyow leven-niverys. Pubonan a lever an geryow yn prynt poos. 'Gurab tú mo boile' bo Brestplat Padrik Sans yw hympnys Keltek hag yw pur dha dhe leverel dherag an salm. An offis ma re beu sensys sempel, may halla va bos remembrys, hag yndella war an diwedh bos radn a rythym naturek an pysadow keniver jorna.*



Cowethas Peran Sans yw cowethyans ecumenek a Gristyon Gernowek, hag hi esely ow whilas convedhes hag yncarnatya y'ga bewnans spyrysecter an Sens Keltek a Gernow, kevradna an spyrysecter na gans tus erel, ha kerdhes dhe voy tender war an dor hedrogh ma. Mar myn'ta dysky moy a-dro dhe'n Cowethas, ke dhe <http://www.peransans.org> le may fydh clewys an geurgan dre vayn gorhevren. Mar nyns yns i dhe vos dasgwerthys, y hyllir gul copiw a'n offis ma heb cubmyas dherag dorn dhyworth Cowethas Perans Sans. Y hyll an offis bos kevys yn Sowsnek ynwedh.